

## **PAULO ENA REVAREVA GINI CUNANA TIMOTEO ENA**

<sup>1</sup> Lau Paulo, Keriso Iesu ena aposetolo taugu, Ihamaurida Diravana bona Keriso Iesu eda Helaro edia hahegani daidiae,

<sup>2</sup> natugu korikori Iesu ibadinana ai, Timoteo, na tore henimumu: harihari-bada bona hebogahisi bona maino, Tamada Dirava ena amo bona Keriso Iesu eda Lohiabada ena amo, bavabi.

### *Emu ġaukara*

<sup>3</sup> Makedonia nala negana ai, na noimu Efeso ai ba noho taritari nato, haida ba sisiba henidia, hahediba herevadia idaudia basie gwaurai

<sup>4</sup> bona gori bona uru ihagaudia basie lalo-hadailai, helaoreana. Badina be unu na hepa-pahuahu e havaramu, a Dirava ena gaukara, una na abidadama amo e varamu, na asie duruamu.

<sup>5</sup> Egu hahedua anina korikori be lalokau, lalo-ġoevaġoева amo bona lalo hadai maoromaorodia amo bona abidadama korikori amo e varamu.

<sup>6</sup> Haida ese unu amo vada e raka siri, edia dala vada e reaia, hereva kavakavadia e gwauraimu,

<sup>7</sup> sibodia taravatu ihadibalaidia taudia ai baela e tomu. Ĝau tamona, edia hereva anidia bona e gwaurai goadagoadamu ġaudia na asi dibadia.

<sup>8</sup> Taravatu be namo, tau ta ese baine ġaukaralaia maoromaoro negana ai.

<sup>9</sup> A baita diba, taravatu vada e haginia, dia kara maoromaoro tauna ena, a kara-havara taudia edia bona gwau-edede taudia edia, Dirava garina asie garimu taudia edia bona kara dikka

taudia edia, tamadia sinadia e aladiamu taudia  
edia bona roroma taudia edia,

<sup>10</sup> heuda-hanai taudia edia bona mata-bodaga  
taudia edia, taunimanima e henaodiamu taudia  
edia bona koikoi taudia edia, gwau-hamata koikoi  
taudia edia bona hahediba herevadi momokani-  
dia e inai henimu taudia edia.

<sup>11</sup> Unu hahediba herevadia momokanidia be  
Herea-dae bona Hairai Diravana ena sivarai  
namo; bona ia ese ena sivarai namo iregūna tauna  
ai vada e halaogu.

<sup>12</sup> Siahu e henigu tauna, eda Lohiabada Keriso  
Iesu, na hanamoamu, badina be e haerogu vada  
na momokani, bona e abigu hidi ena hesiai taugu.

<sup>13</sup> Ena be gunaguna na ere dikava, na dağedağē  
heniava, ladana na hadikaiava, to e bogagu hisi;  
badina be mata-lahui ai na karava, asi egu ka-  
monai dainai

<sup>14</sup> Bona eda Lohiabada ena harihari-bada vada  
e bada herea egu ai, abidadama bona lalokau na  
davaria Keriso Iesu lalonai.

<sup>15</sup> Ina hereva na momokani, iabi-daena danu  
namo: Keriso Iesu na kara dika taudia ihama-  
ridia totona tanobada ema. A dika hereana be lau.

<sup>16</sup> Badina binai e bogagu hisi: Iesu Keriso ese  
haheauka idoinai lauegu ai baine hahedinaraia  
guna, gabeamo bae abidadama henia ela bona  
mauri hanaihanai bae abia taudia ese lau bae  
hañoigū.

<sup>17</sup> Uru iboudiai edia Pavapava, mase asi dibana,  
asi ita-itana, sibona mo Dirava, aita matauraia  
bona aita imodaia, harihari ela bona hanaihanai.  
Amen.

<sup>18</sup> Natugu Timoteo e, ina hahegani na  
henimumu e gwauraimu gunava herevadia

heğereğeredia; unu amo tuari namona ba tuarilaia,

<sup>19</sup> abidadama bona lalo-hadai namodia ba kahu tao tarika-tarika. Haida ese vada e kahu nege, e kara edia abidadama vada eha tata kohi na heto.

<sup>20</sup> Ta be Humenaio, ma ta Alesana; raruosi be Sataña vada na henia, bae mata kani, Dirava ladana basie hadikaia lou.

## 2

### *Ĝuriĝuri herevadia*

<sup>1</sup> Taunabunai, egū hahealo gini-gunana binai: noinoi bona ĝuriĝuri be Dirava igamena bona ihanamolaina ba kara, taunimanima daidiai,

<sup>2</sup> bona hanua pavapavadia bona lohiadia danu daidiai. Unu amo Dirava ibadinana bona imatajraina lalodiae baita noho namonamo mai mainoda ida.

<sup>3</sup> Una be namo, Ihamaurida Diravana ihamoalena;

<sup>4</sup> badina be ia na e uramu taunimanima iboudiae bae mauri bona hereva momokani bae dibia.

<sup>5</sup> Badina be Dirava na tamona; bona herohe-maino tauna danu tamona, Dirava bona taunimanima padadi, tauna be Keriso Iesu.

<sup>6</sup> Ia sibona ena mauri e hen, taunimanima iboudiae idavalaidia, ihamomokanina na nega krikori ai e hedinarai.

<sup>7</sup> Una dainai haroro tauna bona aposetolo tauna e gwauraigu; na hereva momokanimu, asina koikoimu. Bona idau bese taudia edia hahediba tauna ai e halaogu, kamonai ai bona hereva momokani ai baina hadibadia.

<sup>8</sup> Taunabunai, lau na uramu gabu iboudiai tatau bae ġuriġuri, ima helaġadie bae dudui isi; basie badu bona basie hepapahuahu.

<sup>9</sup> Hahine danu dava maraġi dabuadie bae hahe-dokilai, mai manaudia bona mai hematauraidia ida. Huidia basie pani, goldeiava aġeva mai hairaidia basie heralai, dava bada dabuadie danu basie doki.

<sup>10</sup> A kara namo mo bae heralai: una na maoro, Dirava imatauraina e gwaurai hamatamu hahine-dia ediai.

<sup>11</sup> Hahine na lalo-parara baine tahua, asi regereġena, mai lalo-manauna ida.

<sup>12</sup> Hahine na na gwaua tubumu, basine hahediba, bona tau basine gunalaia; ia na asi regereġena baine noho.

<sup>13</sup> Badina be Adam e karaia guna, Heva be gabeai.

<sup>14</sup> Adam danu se koia; hahine hari e koia, bena kara havara ese e butua tao.

<sup>15</sup> A natuna iabina ai mauri baine davaria, kamonai bona lalokau bona kara helaġa baine badina mai lalo-pararana ida negana ai.

### 3

#### *Dagi herevadia*

<sup>1</sup> Ina hereva na momokani: tau ta ese heitatao dagina baine tahua, ia na dagi namona baine ura henia.

<sup>2</sup> Taunabunai, heitatao tauna na basie habadelia diba baine namo; ia danu hahine tamona adavana, boga-auka tauna, aonega tauna, kara manada tauna, heabi-dae tauna, hahediba mai dibana tauna.

<sup>3</sup> Vine ranuna basine inu momo; basine heatu; baine ġaukara mai manauna ida; basine heai; moni basine mata ġaniġani henī.

<sup>4</sup> Iena ruma baine reġua namonamo, natuna danu baine reġudia, bae kamonai henia bona bae matauraia;

<sup>5</sup> badina be tau ta ese ena ruma korikori taudia basinema reġudia diba, Dirava ena ekalesia oreana ede bema reġua toma?

<sup>6</sup> Ekalesia tauna matamatana ese ina dagi do basine abia, baine hekokoroku bena diabolo ena dibigaġani ese baine butua tao na garina.

<sup>7</sup> Ia harina baine namo murimuri taudia ediai, haida ese bae habadelaia bena diabolo ena idoa ai baine keto na garina.

<sup>8</sup> Diakono danu unu bae heto: bae matau; basie udu mauri; vine ranuna basie inu momo; moni basie mata ġaniġani henī;

<sup>9</sup> Iesu ibadinana herevadia bae badina mai lalodilia ġoevadia ida.

<sup>10</sup> Bae dibadia guna; bena ta basinema habadelaidia, diakono karana bema kara.

<sup>11</sup> Adavadia danu bae matau, basie ere dika, bae boga auka, ġau iboudiai bae heabidadama.

<sup>12</sup> Diakono na basie hodara; natudia bona edia ruma taudia bae reġudia namonamo.

<sup>13</sup> Badina be diakono ġaukarana e karaia namonamomu taudia na taunimanima ese bae matauraidia, bona Keriso Iesu ikamona īna ai bae goada balaheni.

<sup>14</sup> Ini hereva na tore henimumu; ġau tamona na helaromu baina vasi haraġa na tomu.

<sup>15</sup> A bama halah, ini amo boma diba taunimanima na ede bae kara toma Dirava ena

orea lalonai; Mauri Diravana ena ekalesia bunai, hereva momokani duna bona badina.

<sup>16</sup> Momokani, eda Dirava ibadinana herevana hehunina na bada:  
 Tau anina ai e hedinarai;  
 Lauma ese maorona e gwauraia;  
 Aneru ese e itaia;  
 Bese idau-idau bogaradai e harorolaia;  
 Tanobada ai e kamonai henia;  
 Hairai ai e abia dae.

## 4

### *Aniani herevana*

<sup>1</sup> Lauma ese vada e gwauraia hedinarai, nega gabedia ai haida ese Iesu ibadinana bae rakatania, dibaka laumadia bae kamonai henidia, bona lauma dikadia edia hahediba herevadia bae abi dae.

<sup>2</sup> Hari hahediba koikoidia na dibaka taudia haida edia amo. Idia be e kara lalodia na auri siahuna amo e gabu na heto.

<sup>3</sup> Idia ese taunimanima e gwaudia taomu, basie headava e tomu, bona aniani haida basie ani. A unu aniani na Dirava ese e kara ġaudia; kamonai taudia bona hereva momokani dibadia taudia ese Dirava bae hanamo guna ġuriġuri ai, bena bae ani.

<sup>4</sup> Badina be Dirava ese e kara ġaudia iboudiai nanamo, bona asi taravatudia danu; taunimanima ese Dirava bae hanamo, bena bae abi.

<sup>5</sup> Badina be Dirava ena hereva bona taunimanima edia ġuriġuri ese eme hahelaġadie.

<sup>6</sup> Ini hereva oi ese varavarada ba hadibalaidia; bena Keriso Iesu ena hesiae tauna namona ai baola, Iesu ibadinana bona hahediba herevadia

namodia, vada o badina guna ġaudia, ese do bae ubumu.

<sup>7</sup> A taunimanima mo edia gori kavakavadia ba dadarai; Dirava ibadinana mo ba goadalaia.

<sup>8</sup> Badina be tau-anina ihagoadana na taina namo, a Dirava ibadinana ese ġau iboudiai e hanamodiamu; ia hari mai gwauhamatana, ina mauri ena bona mauri gabena ena.

<sup>9</sup> Ina na hereva momokani; baita abia dae hari namo.

<sup>10</sup> Badina bunai ta hekwarahimu bona ta hisi-hisimu, badina be Mauri Diravana ta abidadama heniamu. Ia na taunimanima iboudiai ihamauridia, to kamonai taudia ediai anina na bada.

### *Ekalesia oreana ireġuna*

<sup>11</sup> Ini hereva ba hahedualai, ba hahedibalai.

<sup>12</sup> Ta basine dadaraimu oi na eregabé mo dainai. A hereva ai, kara ai, lalokau ai, abidadama ai, lalo-ħoeva-ħoeva ai, kamonai taudia edia iħaġoina tauna ai baola.

<sup>13</sup> Buka Helaġa iduahina, haroro, hahediba, ba goadalai ela bona lau baina vasi.

<sup>14</sup> E henimu herahiana iġaukaralaina ai basio manoka; peroveta edia hereva heġereġeredia ai e henimu, heitatao taudia ese imadia na oi tubuamu ai e ato kau negana ai.

<sup>15</sup> Ini ġau ba manadalai, lalomu idoinai ba henedia, bena emu goada na taunimanima iboudiai vairadiae baine hedinarai.

<sup>16</sup> Sibomu nahuamu ba tohoa, bona emu hahediba herevadia nahuadia ba toho; ba badina tarika-tarika. Unu ba kara toma, bena sibomu ba hahemauri, bona bae kamonai henimu taudia danu ba hamauridia.

**5**

<sup>1</sup> Tau badana ta basio gwau henia; ba hahealo henia tamamu na heto. Eregabe taudia ba hereva henidia tadikakamu na heheto.

<sup>2</sup> Hahine badadia ba herwa henidia sinamu na heto. Eregabe hahinedia ba hereva henidia tai-humu na heheto, mai lalomu ġoevaġoevana ida.

<sup>3</sup> Vabu ba matauraidia, bema vabu korikori.

<sup>4</sup> To vabu ta bema mai natuna eiava mai tubuna, idia na bae diba, Dirava ibadinana na edia ruma korikori ai bae haġuġurua guna, natudia ese tama-dia sinadia bae ubudia; badina una be kara namona Dirava vairanai.

<sup>5</sup> A vabu korikori, asi varavarana, ese Dirava e abidadama heniamu, e noinoi hanaihanaimu, e ġuriġuri boimu e ġuriġuri ranimu.

<sup>6</sup> A tau-anina ena moale e tahuamu vabuna, ena be e maurimu, to vada e mase.

<sup>7</sup> Unu ba hahedua toma, bena asi bebekabebekadia bae noho.

<sup>8</sup> Varavarana se naridiamu bona ena ruma taudia se ubudiamu tauna ese Iesu ibadinana e ġoreamru; ena dika ese murimuri tauna ena dika e hereaiamu.

<sup>9</sup> Vabu ladana basio tore aela bona ena vara laġanidia tauratoi-ahui bae ore. Tau tamona e adavaia hahinen,

<sup>10</sup> ena kara namo daidiae imodaiamu hahinen, natuna e ubudiava hahinen, laolao taudia e abidia daeva hahinen, helāga taudia aedia e huriva hahinen, hisihisi taudia e durudiava bona kara namodia iboudial e goadalaiva hahinen, ia hari ladana ba tore.

<sup>11</sup> A vabu eregabedia ladadia basio tote; badina be edia ura dikadia daidiae Keriso bae dadaraia,

bae headava lou.

<sup>12</sup> Bena hahemaoro bae abia, badina be edia gwauhamata gunana vada e negea.

<sup>13</sup> Bona lahedo karadia e manadalaimu, idau ruma idau ruma e dae kau dae kaum; dia lahedo mo, a udu mauri danu, e gado kau gado kaum, e ere dikamu.

<sup>14</sup> Taunabunai, lau na uramu vabu eregabedia na bae headava, natudia bae havaradia, edia ruma taudia bae regudia; bena e inai henidamu tauna na basine habadelaida diba.

<sup>15</sup> Badina be haida vada e raka oho vaitani, Satana vada e ġavaia.

<sup>16</sup> Iesu ibadinana hahinen ta varavarana haida bema vabu, ia ese bema naridia, ekalesia oreana basinema hametaua. Unu amo ekalesia ese vabu korikori baine naridia diba.

<sup>17</sup> Heitatao taudia ese taunimanima e hakaudia namonamomu na ba matauraidia, bona heitatao taudia haroro bona hahediba e goadalaimu na ba matauraidia bada.

<sup>18</sup> Badina be Buka Helaġa na e gwaumu: Boromakau ese uit e moimoilaiamu negana ai na uduna basio ġuia. Ma e gwaumu: Ĝaukara tauna ese davana baine abia, una na baine namo.

<sup>19</sup> Haida ese heitatao tauna bae habadelaia, edia hahebade basio abia dae, ela bona dibadia taudia rarua eiava tatoi ese bae gwauraia hedinarai.

<sup>20</sup> Kara dika e manadalai taudia ba gwau henidia, taunimanima iboudiai vairadiai, bena oredia vada bae gari.

<sup>21</sup> Dirava bona Keriso Iesu bona e gwauraidia hidi anerudia vairadiai na haġanimumu, ini hahe-dua herevadia na ba badina; lalomu basio hadaia kava, bona emu hahemaoro basio hagagevaia.

<sup>22</sup> Imamu na tau ta tubuana ai basio ato kau haraā; haida edia kara dikadia basio durudia; sibomu nahuamu ba tohoa, ba āgoevaāgoeva.

<sup>23</sup> Ranu kavakava basio inua, a vine ranuna kuri ta ta mo ba inu, bogamu ihanamona, badina be o gorere louloumu.

<sup>24</sup> Taunimanima haida edia dika vada eme hedinarai, e kara e gunalaidiamu na heto, ela bona hahemaoro gabuna; a haida edia dika e kara e āgavadiamu na heto.

<sup>25</sup> Unuhetomana danu kara namodia haida vada e hedinaraimu, a asie hedinaraimu āgaudia na basie hehuni daudau.

## 6

<sup>1</sup> Maduna henunai hesiai taudia iboudiai na lalodia bae hadai maoro, biagudia bae matauraidia, Dirava ladana bona iseda hahediba herevadia bae hadika na garina.

<sup>2</sup> Haida biagudia be Iesu ibadinana taudia; to imatauraidia basie hamaraāia idia na varavara dainai. A isiaidia bae lao hen mai goadadia ida, badina be edia kara namo ese e hanamodiamu taudia na Iesu ibadinana taudia bona edia lalokau. Unu ba hadibadia toma bona unu ba hagoedadadia toma.

<sup>3</sup> A baine hahediba kerere, eda Lohiabada Iesu Keriso ena hereva maoromaorodia bona Dirava ibadinana herevadia hegeregēredia basine gwaurai,

<sup>4</sup> tauna na hekokoroku tauna. Ia na āgau ta asi dibana; henanadai bona hepapahuahu mo e ura hen kavamu. To unu amo e varamu āgaudia bini: vaāgege, heai, ere-dika, lalo-hadai dikadia,

<sup>5</sup> bona lalodia e kereremu bena hereva momokani vada e rakatanimu taudia edia hepapahuahu asi anidia. Idia banava e tomu Dirava ibadinana na kohu idavarina dala.

<sup>6</sup> Momokani, Dirava ibadinana mai lalo-umona be kohu badana ta.

<sup>7</sup> Badina be āgau ta tanobada ai asita mailaia, āgau ta danu basita laohaia.

<sup>8</sup> Taunabunai, malamala bona hahedoki baita davari, unu hari laloda ese bae moalelai na namo.

<sup>9</sup> A taāga e ura heniamu taudia na hedibaāgani ese e butudia taomu, bona ura kavakavadia bona ura dikadia, idoa na heheto, ese e abidiamu. Tauni-manima ihabua-taridia āgaudia bunu, mase hanai-hanai ai e hadonodia masemu.

<sup>10</sup> Badina be moni iura-henina na dika idoinai ramuna; bona e ura henia bada taudia haida ese Iesu ibadinana vada e rakatania, bona hisihisi momo amo sibodia vada e hedai uru.

### *Hahedua herevadia*

<sup>11</sup> A oi, Dirava ena hesiai taumu e, unu āgau iboudiai ba heautani; kara maoromaoro, Dirava ibadinana, kamonai, lalokau, haheauka, lalomanau, ba āgava.

<sup>12</sup> Kamonai ena tuari namona ba tuarilaia. Mauri hanaihanai iabina totona vada e boirimu, bona mauri hanaihanai harina namona vada o gwauraia hedinarai, dibadia taudia hutuma vairadai; benaini, vada bavabia tao.

<sup>13</sup> Āgau iboudiai edia mauri e henidiamu Diravanaugh vairanai, bona Keriso Iesu, hereva namona Pontio Pilato vairanai e gwauraia Tauna, vairanai, na haduamumu:

<sup>14</sup> ina hahegani ba badinaia, asi toutouna bona asi ihabadelaina, ela bona eda Lohiabada Iesu Keriso baine hedinarai.

<sup>15</sup> Nega namona ai Ģaubada namo-hereana ese baine hahedinaraia; ia mo sibona Ģaubada; pava-pava edia Pavapava; lohia edia Lohia;

<sup>16</sup> ia sibona e noho hanaihanaimu, asi iraka-kahikahina diarina ai e nohomu; ta ese asine itaia, bona ta ese basine itaia diba. Hemataurai bona siahu ienai bae mia hanaihanai. Amen.

### *Hahetoni herevadia*

<sup>17</sup> Taǵa taudia ina tanobada ai ba haduadia, basie hekokoroku, asie mia daudaumu kohudia na basie laro, a Mauri Diravana mo bae laroa. Ia ese ihamoaleda ġaudia iboudiai e henida dudu kaum.

<sup>18</sup> Ba haduadia danu, kara namodia bae kara, edia taǵa ġaudia bunu. Edia kohu bae hariharilai, heabi-dae taudia ai baela.

<sup>19</sup> Unu amo edia badi namona bae abia hegægæ, vairada dinadia ena, bena mauri korikori bae abia tao.

<sup>20</sup> Timoteo e, vada e henimu ġauna ba gimaia; hereva dikadia bona kavakava herevadia bona aonega koikoidia hepapahuahudia amo ba raka oho.

<sup>21</sup> Unu na haida ese vada e abi dae, bena Iesu ibadinana vada e reaia.

Harihari-bada emu ai baine mia.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca